

國民 文獻 分類

民國文獻類編

歷史地理
卷

931

民國時期文獻保護中心
中國社會科學院近代史研究所
編

國家圖書館出版社

民國文獻類編

歷史地理
卷
931

民國時期文獻保護中心
中國社會科學院近代史研究所
編

國家圖書館出版社

2812.6
10/931

2812.6/10

第九三一冊目錄

朱興武將軍哀輓錄	一九一六年出版		一
詹大悲先生事略	民國間出版		二一三
李純全史、軼事合刻	吳虞公、張雲石編	上海世界書局，一九二一年出版	二四五
徐樹錚正傳	中央國史編輯社編	中央國史編輯社，一九二四年出版	二九七
夏瑞芳先生追悼會公啓（附事略小傳）	一九一四年出版		三七七

朱興武將軍哀輓錄

朱興武將軍
哀輓錄

興武將軍朱公介人遺像



贊曰

饒之上將維邦之傑光我
華夏福我越絕心戈為
武不忍迺伸哀告天鑒躬
瘁國活樹此儀型昭示
東哲

沈銘昌



興武將軍海鹽朱公事略

公朱姓諱瑞字介人浙江海鹽人父廷楨母爲同縣王葆善女兄弟三長復初縣學廩生早世次錫康官江西金谿縣知事公其季也三歲居父憂家毀於火孤嫠煢煢相依爲命守禮勵學鄉黨稱賢公七歲舉止異常兒從長兄學質鈍志劬讀春秋左氏傳至戰陣事每徹夜不寐琅琅之聲達戶外必求爛熟而後已既而母若兄相繼歿公十有二齡居喪盡哀若成人然年十八肄業於秀水中學校踰年歸試補縣學生員會日俄構釁公痛外患日棘謂非修戎事不足以圖強乃投考於南洋陸師學堂乙巳畢業還浙任本省督練公所參謀處各差旋調充步隊第二標執事官遂與標統蔣尊簋剏設弁日學堂日以訓練將才爲務綿歷三載以勇任事明建議爲儕輩折服其時清政不綱天下洶洶光復同盟各會圖改革浙中志士咸與之公率所部相與結合己酉移皖任督練公所參謀處提調兼測繪學堂監督庚戌回浙任步隊營管帶繼擢標統辛亥八月武昌起義沿江州郡相繼反正吾浙於九月十四日光復不一月全境底定公始終其事爲力甚勤時蘇

滬獨立惟江寧未下於是公有率浙軍會合蘇鎮聯軍攻克江寧之役蓋十月十三日也先是武昌安慶既不勞師而下獨江寧不附迨漢陽民軍失利江上諸軍爭言援鄂不能分兵東趨以徇江寧則浙與蘇交受其困東南之事未可知也公乃與浙江都督湯壽潛議長江形勢上有江陵下有江寧今欲舉吳楚之地興北伐之師必先定江寧則上游之師可出江漢以窺宛洛下游之師可踰淮以取山東若曠日持久士氣易墮非策也惟鎮江爲江寧門戶清駐有防兵若浙師不卽出使其懷疑思抗備而待我尤爲非策湯遂以浙兵八千人屬公凡爲步隊兩標游擊隊兩營馬礮工輜及敢死隊各一營陸軍警察一隊以九月二十三日出浙合蘇滬各軍共策進取會林述慶既下鎮江公與聯軍定議率部首發進規高資及下蜀十月一日至龍潭聯軍乃大集浙軍分道先驅遂領烏龍山合黎天才軍進取幕府山繼有孝陵衛之捷轉戰數晝夜至八日乃破天保城十二日突擊朝陽門而江寧始下是役也浙軍夜襲天保城者三隊官葉仰高力戰死士氣愈奮卒以先登夫江寧恃天保城爲要塞斯城既得下瞰江寧命礮無不中故守兵不

戰而自走矣公既入江寧下令不妄殺不得肆掠奪以是浙軍論功爲聯軍最而紀律之嚴亦過他軍既而聯軍定北伐公領師渡江詞意慷慨兵次符離集以政體既定還師江寧天寒遠征軍事旁午公與士卒甘苦相共而肺病實始於此時南北意見紛歧公創議聯合各軍設聯軍參謀團尊重中央政令融畛消域於是南北乃漸就統一嗣陸軍部改編浙軍爲第六師第二十五師任公爲第六師長旋合編爲第五軍擢軍長兼領第六師事然督兵居江寧前後六閱月始還浙先是北伐各軍退居江上無何贛軍譁變閭巷囂然公在軍中日爲解紛退事撫輯不日卽靖江寧人德之留浙軍乞勿卽去也浙江自光復後初公推湯壽潛爲都督繼任者爲蔣尊簋至八月公代蔣爲浙江都督兼民政長政府以公功并授陸軍上將銜陸軍中將在職五年百廢具舉軍懷其德吏肅其威舉凡教育實業水利市政諸大端力事提倡說者謂文武兼資公無媿焉二年七月贛寧兵興戰禍及於淞滬浙爲隣壤勢亦晚艱公力持鎮定曉於衆曰吾浙人也安危與浙共之不知其他守境戒嚴塵市不擾故當時海內視浙爲樂土迨事平公亦病告休不

得乃堅請免民政長兼職舉內務司長屈映光繼之以實行軍民分治蓋公本久持此議也是年特授勳二位先後並授一等文虎章一等嘉禾章三年六月改官興武將軍督理浙江軍務其時友邦賓使往來於浙者踵相接公輒以外交體大舊時所習英日語言文字爲頻年軍事所閒荒落泰半與外賓通款曲假舌人時虞隔閼故每日晨起必溫習其所學雖機務紛集不稍輟其習學勤政類如此四年國體改革之說大張公盡焉爲憂其病日亟十二月滇黔兵起公乃與今副總統河間馮公提挈蘇浙互爲之備蓋馮時領軍江寧其議謂浙與蘇皆四戰之地自辛癸以來休養生息元氣甫復故相約以保境息民泊五年三月桂粵宣告獨立四月浙人亦羣謀應之公慨然曰以浙之地理兵力而宣布獨立吾恐殘民以逞人笑其後然過衆志而啟內訌吾不足惜浙且先蒙其禍遂撤衛引去瀕行時猶以電話告主張獨立首事諸君善保地方秩序公既去浙居上海養病者三月餘浙中有來言浙事者公惟以維持地方爲言嗣以醫者謂北方濱海之地宜於病遂徙居天津病終不治彌留之頃無一語及家事卒於民國五年八月三日爲

舊歷丙辰七月五日也春秋三十有四事聞大總統深爲悼惜令陸軍部照上將例從優議卹妻張氏爲世楨女弟子二積壘積標孿生也俱幼公狀貌英挺秉性淳厚治事慎密有決斷於人重然諾樂任卹故公之卒於天津及歸櫬於鄉賻唁絡繹歐美諸僑人亦相率來弔於此可以覘公之遺澤感人之深矣嗚呼恆幹中摧才不竟用此則海內知公者所同聲歎咤也世楨與公爲懿親從公久知公詳爰綴其爵里行誼以著於篇無溢美無阿好以告當世並備立言之君子採擇焉臨文哽噎不盡所云張世楨識

興武溘逝天下惜之上自政府下及吏民外暨歐僑諸人莫不各有哀輓之作自天津邸舍治喪而後扶輓南還而濟南而浦口而江寧而蘇州而嘉禾以達海鹽本籍就家設奠中間輾轉長途舟車互運執事者奔走倉卒應接不暇因之輓章遺失實多茲就其存者依受件先後爲次彙爲一編謄印之訛奪在所難免惟閱者諒焉至弔唁函電文繁概不錄載編者識

朱興武哀輓錄甲編

公文

黎大總統令

民國五年八月九日

前興武將軍督理浙江軍務朱瑞當民國肇造之際艱難赴事功在國家嗣於浙江將軍任內綏靖地方軍民翕服中年瘁疾屬望方長溘逝驟聞深爲惋惜朱瑞著交陸軍部照陸軍上將例從優議恤以旌往績此令

陸軍部呈文

呈爲遵令議卹事本年八月九日奉

大總統令前興武將軍督理浙江軍務朱瑞當民國肇造之際艱難赴事功在國家嗣於浙江將軍任內綏靖地方軍民翕服中年瘁疾屬望方長溘逝驟聞深爲惋惜朱瑞著交陸軍部照陸軍上將例從優議卹以旌往績此令等因奉此查該督理朱瑞勳績聿昭此次積勞身故詳加覆核與陸軍平時卹賞暫行簡章第四條在軍營立功後病故給卹之規定相符擬從優照平時卹賞表第二號上將階

級給與一次卹金七百元並請特給治喪銀二千元於其靈柩回籍時飭知沿途地方官妥爲照料以示優異而資表彰是否有當理合具文呈覆伏乞鑒核示遵謹呈

陸軍部咨直隸朱督軍文

案查前興武將軍督理浙江軍務朱瑞積勞病故本年八月九日奉

大總統令交陸軍部照陸軍上將例從優議卹等因當經本部核議照上將積勞病故例給予一次卹金七百元並特給治喪銀二千元其靈柩回籍時著沿途地方官妥爲照料以示優異卽由該部轉行遵照此令等因除分行外相應粘抄原呈並頒發一次卹亡金執照一份咨行查照飭知該故上將家屬具領並希轉飭一體遵照可也此咨

直隸朱督軍呈文

呈爲興武將軍朱瑞病故津厲臚陳勳績請予褒卹仰祈鈞鑒事竊據天津縣知事似錫章呈稱前興武將軍督理浙江軍務朱瑞年三十八歲因患氣喘等證來